

Txirritola

ARAMAIO / Barikua / 2004ko ekainaren 18a / 113. zenbakia

KOORDINATZAILEA: Ubane Madera • Otalora Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

XVI. mendeko Baskonia aztertuko dute aurtengo udako ikastaroetan

UBANE MADERA

Datorren uztailearen 6an hasiko dira Aramaioko III. Udako Ikastaroak, eta lau egunez izango dira eskolak, uztailearen 9ra arte, hori ere barne. XVI. mendeko Baskonia izango dute aztergai oraingo honetan, sasoi hartako kultura eta gizartea, hain zuzen ere.

Uztailearen 6an, irekitze saioaren ostean, Juan Perez de Lazarraga poeta eta kronista izango dute hizpide. Lau berbalde emango dituzte; tartean, EHUko Filologia eta Geografia Fakultateko dekan Joseba Lakarrak berba egingo du, baita Pruden Gartzia Isastik ere, Euskaltzaindiko liburutegiko arduradun eta historialariak. Horren ostean, mahai-ingurua egingo dute eta antzinako musikan oinarritutako kontzertua.

Bigarren egunean, uztailearen 7an, Baskonian izan ziren erlijio aldaketak aztertuko dituzte hiru adituk. Hala, Salamancako Unibertsitate Pontifizeko historialari Jose Ignacio Telletxeak Baskoniako hegoaldeko katolizismoa eta protestantismoa aztertuko ditu; eta Henrike Knörr euskaltzain eta irakasleak, berriz, Joanes Leizarragaren lana izango



Ohi den moduan, eskolak kultura etxeko zine-aretoan izango dira.

du hizpide. Horren ostean, mahai-ingurua egingo dute.

Hirugarren egunean erabat aldatuko dute aztergaia; izan ere, Ameriketara joan ziren euskaldunak izango dira protagonista. 1500-1600 urteen artean izan ziren abenturazale, misiolari, ontzijabe eta armadoreen gainean berba egingo dute. Lau berbalde izango dira. Tartean, EHUko Agustin Azkarate maisuak XVI. mendean Ternuan eta Labradorren izan ziren euskaldunen gainean berba egingo du eta EHUko histo-

rialari Oscar Alvarezek Amerika kolonialean bizi izan ziren euskaldunen gainean.

Bukatzeko, uztailearen 9an, barikua, foru nortasunaren aurrekariak aztertuko dituzte. Adibidez, Araban, Bizkaian eta Gipuzkoan foru-instituzioekin lotuta eman ziren aurreneko pausoen gainean berba egingo du EHUko irakasle J. Ramon Diaz de Duranak eta euskal nortasun politikoaren konfigurazioa berbagai izango du Nafarroako Unibertsitateko maisu Juan Madariagak.

Uztailean, abuztuan eta irailean zinema-emanaldiak izango dira

U.M.

Aurtengo oporretan, zinema ikusteko Gasteizera edo bestelako herrietara joan beharrean, Aramaion geratzeko aukera izango da. Izan ere, herriko zinema zaleen taldeak uztailean hasi eta irailean arteko zinema-egitaraua prestatu du.

Oraindik ez da segurua udan urteroko zinema-emanaldiak izango diren. Hori bai, dagoeneko ziurtatu digute barikuetako zinema-emanaldiek aurrera egin-

go dutela opor sasoiaren, baita abuztuan ere.

'EL SEÑOR DE LOS ANILLOS'

San Martin jaien ostean hasiko dira egitarau berriarekin. Hala, uztailearen 9tik aurrera, *Seabiscuit*, *más allá de la leyenda* eta *El Señor de los Anillos* trilogia arrakastatsuen hiru zatiak ikusteko aukera izango da.

Abuzturako, Ameriketako Estatu Batuetako lau film aukeratu dituzte: *Cuando menos te los esperas*; *House of Sand and Fog*; *Monster* eta *La sonrisa de Mona Lisa*, hain zuzen ere. Eta iraile-

rako bi film aukeratu dituzte: *Bajo el sol de la Toscana* eta *La joven de la Perla*.

Esan beharra dago udako orduetgia dela eta barikuetako zinema-emanaldiak 22:30ean hasiko direla, baita ekainekoak ere.

EKAINEN AZKENEKOA

Hain zuzen ere, ekainerako antolatutako filmetatik azkena emango dute gaur, barikua. Oraingo honetan, Clint Eastwoodek zuzendutako *Mystic River* filma emango dute. Sean Penn, Tim Robbins eta Kevin Bacon dira, besteak beste, filmeko protagonistak.

Zuiako Koadrilako txokoetarako ibilaldiak

U.M.

Inguruko hirigintza eta arkitekta historikoa ezagutarazteko helburuarekin, Zuiako Koadrilak hiru ibilaldi gidatu antolatu ditu datozen hilabeteotan egiteko. Hilero izango da hiru ibilaldiak egiteko aukera. Ibilaldietako bat Aramaioraino iristen da. Ibilaldiak goizetik eguerdira artekoak dira.

Urtegien Ibilbidea, Dorretxeen Ibilbidea eta Ur-jausien Ibilbidea. Horiexek dira Zuiako Koadrilak eskaintzen dituen aukerak.

Urtegien ibilbidean, Zurbano, Uribarri Ganboa, Legutiano eta Aramaio bisitatuko dituzte. Dorretxeen Ibilaldiaren bitartez, berriz, Zuia, Zigoitia, Elosu, Manurga, Murgia, Bitoriano eta Letona herriak bisita daitezke. Eta Ur-jausien Ibilaldiak, Urkabustaiz, Abornikano, Izarra, Goiuri, Beluntza eta Uzkiano bisitatzeko aukera eskaintzen du.

EGUN ERDI EDO EGUN OSOA

Lehen esan dugun moduan, hilero izango da hiru ibilaldiak egiteko aukera. Horretarako egutegia zehaztu dute: hileko hiru domeketan, irteera bat. Adibidez, oraingo hilari dagokionez, etzi, dome-

ka Ur-jausien Ibilaldia egingo dute eta hurrengo domekan Urtegien Ibilbidea. Uztailean, Ur-jausien Ibilbidea egingo dute aurreneko domekan, hilaren 4an; dorretxeena, hilaren 10ean eta ur-jausiena, hilaren 18an. Abuztuan ez dute ibilaldirik egingo, eta hurrengoak irailean eta urrian izango dira.

Ibilaldietako batzuk 09:00etan aterata eta 14:00-14:30ean bueltatzekoak dira. Ostera, beste batzuk egun osokoak dira. Lehenengo kasuan, hiru euro ordaindu behar da irteera; eta bigarren kasuan, 15 euro. Kasu bietan bisita gidatuak egiteko autobusa erabiliko dute eta hori prezioaren barruan dago sartuta. Bestalde, egun osoko ibilaldien kasuan, eskualdeko jatetxe batean bazkaria egitea kontuan hartu dute eta hori 15 euroko prezio barruan sartuta dago. Ibilaldi gehienetara josteko, Gasteizko Europa Gizarte Etxetik aterako da autobusa.

IZENA AURREZ EMAN BEHAR DA

Halako ibilaldien batean parte hartu gura duenak aldez aurretik eman behar du izena honako telefono honetan: 945 14 55 98. Dena dela, informazio gehiago behar izanez gero, Aramaioko Udaletxean eska daitezke edo Zuiako Koadrilan bertan.

LABUR

Bihar jokatuko dute Mungiako pilotalekuan eskolarteko txapelketaren finala

Bihar, zapatua, jokatuko dute Mungian Euskal Herriko Eskolarteko Txapelketaren finala. Pilotalekuan izango da, goizez eta arratsaldean. Gogoratu beharra dago lehiakideen artean bi aramaiotar izango direla: Markel Arriolabengoa haurren mailan (beste 11 lehiakideekin batera) eta Iker Agirre gazteen mailan (beste hamar lehiakideekin batera). Unai Iturriaga ibiliko da gaiak jartzen. Bestalde, bihar bertan ere, baina Arrasaten, bertso saioa izango da Monteterran 22:00etan hasita. Partaideen artean, Manex Agirrek jardungo du.

San Martin jaietako kartel lehiaketako irabazleak aukeratu dituzte

Aurtengo San Martin jaietako kartel lehiaketan hiru irabazle izan direla jakinarazi digute. Aurreneko saria Xabier Igoak irabazi du, bigarrena Julen del Campok eta hirugarrena Euken Ugartek. Hurrengo sariok jaietan emango dituzte, eta kartel irabazlea ere ia orduan arte gordeko dute. Zorionak, hirurei!

TELEFONOJAKINGARRIAK

OSASUNA / LARRIALDIK	
Osasun etxea (txandak)	945 44 53 40
Botika	945 44 50 03
Udaletxea	945 44 50 16
Erzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxi eta autobusak	945 44 50 33
Udal kiroldegia	945 44 53 35
Postetxea	945 44 50 83
Zubiako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	
GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: Izaritxoak duten orduetan eskaeraren araberako zerbitzua eskaintzen dute. Auzoetako bizilagunei zuzendutako da, eta autobusa erabili gura badute, bezperan deitu beharko dute honako zenbaki honetara: 629 54 59 23

BOTEPRONTOAN/ Jesusa Bergaretxe · Etxaguengo auzo alkatea

“Lortu gura duguna da auzoa berritzeko proiektua egin eta auzotar guztiak onartzea”

Etxaguen aldera jo dugu oraingo honetan, Ipurtotz baserrira, hantxe bizi da eta Etxaguengo datozen lau urteotarako alkatea: Jesusa Bergaretxe. Hark eman digu auzoko zenbait konturen berri:

Etxaguenen bizi zara, baina hemengoa zara?

Arrasaten bizi izan naiz urtetan, baina Ipurtotzen jaiotakoa naiz, eta orain hemen bizi naiz.

Etxaguenen zela izendatzen duzue auzo alkatea?

Orain arte, aukeratuta, baina azkeneko bozketan erabaki zuten etxeka egitea, txandaka. Etxe bakoitzak erabakitzen du gero zein izango den auzo alkate. **Lehenengo aldira auzo alkate? Ilusionatuta, ala?**

Lehenengo aldia da, bai, baina ez daukat batere ilusiorik. Ardura galanta. Sarri egon naiz gauetan lo egin barik.

Lan zaila duzu aurretik?

Lan asko egin beharra dago. Auzoa dago oso abandonatuta. **Zer, saneamendu arazoak...?** Ez, saneamendua egin zen. Orain berritu beharrean dago. Leku batzuetan apurtuta dago,



baina, arazorik handiena putzu beltza da. Hura egin zuten tokira joateko biderik ez dute kamioiek, hura garbitzeko... Eta arazoa da auzoan ezin garela

elkarren artean konpondu bidea egiteko.

Zeuk badaukazue proposamenik-edo?

Oraintxe gabiltza proposamenak aztertzen bidea lehen dagoen lekutik konpontzeko-edo. Asko kostatuko da... Proiektu batzuk egin guran gabiltza, baina horretarako auzokook ados jarri behar dugu, beharrezko baimeak eman behar dituzte... Eta hori ez dugu lortu. Akordiorik ez dagoen artean, auzoa nahiko abandonatuta egongo da.

Hortaz, urbanizazioa egitea-eta falta zaizue, baina, ez da Udalaren kontua auzotarren arteko ezadostasunarengatik da...

Hori da; dena dela, Udalak ere ez ditu gauzak samur; Diputazioak onartu egin behar dizkio gauza asko eta aspaldi honetan apenas etortzen omen da dirurik Diputaziotik, euskaldunak dezente baztertua gaude-eta. Edozelan ere, gure artean adostasuna lortu izan bagenu akaso eginda egongo ziren gauza asko, proiektuak orain dela urte asko egindakoak dira-eta: urbanizazioa, putzu beltza,

“Ardura galanta da auzo alkate izatea. Sarri egon naiz gauetan lo egin barik”

saneamendua... Bestalde, errepidea ere guztiz abandonatuta dago, baina hori konpontzeko eskaera egin dugu: hesiak eskatuta daude, bide bazterrak konpontzeko eskaera eginda... Diputaziotik dirua iristeko zain gaude. **Hortaz, auzoko gaizki-uler-teez zaildu egingo dizute auzo alkate lana?**

Bai, zenbaitzen arteko gaizki-ulerterek ia denean du eragina. Dena dela, auzotarrak askotan egoten gara elkartean, afariak-eta sarri egiten ditugu eta giro ona izaten da gure artean. **Auzokoei zer esango zenieke?** Elkarren artean konpondu egin behar dugula zela edo hala.

Baster-alde jatetxea

- Zure ezkontza eguna ospatzeko leku eta giro paregabea daukagu.
- 160 lagunentzako jangela eta aparkalekua.
- Terraza berria ahur parkearekin.
- Enpresa bazkariak jangela pribatuarekin.
- Bataioak, jaunartzeak, urtebetetzeak eta lagun arteko bazkariak.

Karta eta menua ditugu aukeran.

Galartza auzoa • ARETXABALETA
Tel./Faxa: 943 79 24 58

